

CYFARFOD	Pwyllgor Craffu Economi a Chymuned
DYDDIAD	11 Rhagfyr 2025
TEITL	Adroddiad Perfformiad Aelod Cabinet Economi a Chymuned
RHESWM DROS GRAFFU	Cyfle i Graffu Perfformiad Gwasanaethau'r Adran 2025/26
AWDUR	Sioned E Williams
AELOD CABINET	Cyng. R Medwyn Hughes

1. Pam fod angen ei graffu?

1.1 Er mwyn i Aelodau'r Pwyllgor graffu ar faterion perfformiad o fewn yr Adran.

2. Cefndir / Cyd-destun

2.1 Pwrpas yr adroddiad yma yw eich diweddarau ar beth sydd wedi'i gyflawni yn y maes rwy'n gyfrifol amdano fel Aelod Cabinet Economi a Chymuned. Mae hyn yn cynnwys amlinellu'r diweddaraf gyda'r addewidion yng Nghynllun y Cyngor; gwaith dydd i ddydd yr Adran; ynghyd â'r diweddaraf o ran cynllun arbedion a thoriadau.

2.2 Rydym yn gweithredu ar Gynllun y Cyngor 2023-28, ac yma rwyf yn adrodd ar y cynnydd a wnaed hyd at ddiwedd Chwarter 2, gan gydnabod ei bod yn parhau'n ddyddiau cynnar yng nghyd-destun rhai o'r addewidion sy'n newydd yn y ddogfen ers Ebrill eleni. Er hynny, mae'r holl faterion wedi bod yn destun trafodaeth ac wedi eu herio gennyf mewn cyfarfod herio perfformiad, ac rwyf yn fodlon gyda pherfformiad yr Adran.

3. Perfformiad Prosiectau Cynllun y Cyngor

3.1 Mae'r tabl yn Atodiad 1 yn rhoi diweddariad ar gynnydd pedwar prosiect blaenoriaeth Cynllun Cyngor Gwynedd 2023-28 mae'r Adran Economi a Chymuned yn gyfrifol am eu gweithredu. Mae tri o'r prosiectau hyn yn adran Gwynedd Lewyrchus o'r Cynllun, sydd yn anelu i gryfhau'r economi a chefnogi trigolion Gwynedd i ennill cyflogau teilwng. Ond mae'r cyfrifoldeb i arwain ffrwd gwaith o fewn prosiect 'Cefnogi trigolion Gwynedd i fyw bywydau llawn a diogel yn ein cymunedau' yn rhaglen Gwynedd Ofalgwr wedi trosglwyddo i'r Adran ers dechrau Ionawr 2025.

3.2 O'r wybodaeth, fe nodwch fod yr Adran wedi gwneud cynnydd da yn erbyn prif gerrig milltir y prosiectau hyn dros y misoedd diwethaf. Y prif risg sy'n gyffredin i'r pedwar cynllun yma ydi fod y cronfeydd sydd wedi ariannu'r gwaith ers 2023 yn dod i ben mis Mawrth 2026 ac ansicrwydd am gyllidebau'r Llywodraeth fydd yn dod yn eu lle.

3.3 Hoffwn dynnu sylw yn benodol at y materion canlynol:

Prosiect Blaenoriaeth: Hyrwyddo Ein Diwylliant ac Economi Ymweld Cynaliadwy

- 3.4 Mae Cynllun Gweithredu Gwynedd & Eryri 2035 (G&E2035) wedi ei roi ar waith i gefnogi economi ymweld gynaliadwy yn y Sir – hynny ar sail y prif bwyntiau godwyd yn yr Arolwg Trigolion 2024, adborth mynychwyr yr uwchgynhadledd fis Chwefror a thrafodaethau yn strwythurau Partneriaeth G&E2035 ac Ardal Ni. Mae gwelliannau ar waith ar draethau mwyaf poblogaidd Gwynedd ac hefyd i gyfleusterau cyhoeddus yn Eryri trwy arian Croeso Cymru. Mae hyfforddiant i drefnwyr digwyddiadau a busnesau twristiaeth wedi eu cynnal. Mae ymgyrch farchnata ‘Hwyl yn Eryri a Phen Llyn’ trwy arian SPF wedi ei gynnal i hyrwyddo ymweliadau y tu allan i'r prif dymor, rhinweddau arbennig yr ardal, cefnogi busnesau lleol ac i bobl barchu'r ardal a'n cymunedau wrth ymweld.
- 3.5 Bu i Ddeddf Llety Ymwelwyr (Cofrestr ac Ardoll) Etc. Cymru ddod i rym fis Medi. Mae'r Cyngor yn cyd-weithio gyda siroedd Conwy a Môn ac Awdurdod Cyllid Cymru i sicrhau bod ein gweithdrefnau ardrawiad effaith, ymgynghori a phenderfynu yn cydfynd lle'n bosib. Bydd adroddiad yn cael ei gyflwyno i'r Pwyllgor Craffu yn eich cyfarfod fis Chwefror 2026.
- 3.6 Mae grantiau gwerth bron i £300,000 wedi eu cynnig i 69 o sefydliadau ar draws Gwynedd i gefnogi gweithgareddau diwylliannol, digwyddiadau a byw'n iach. Mae gweithgareddau prosiect Diwylliesiant 2 ar waith ac yn cefnogi gweithgareddau Gwasanaethau Diwylliannol y Cyngor, Antur Waunfawr ac Eco-amgueddfa Llyn.
- 3.7 Bu i ni gynnal gweithdy diwylliant yn Neuadd Dwyfor ar 15 Hydref i gyd-ddatblygu gweledigaeth ac amcanion ar gyfer diwylliant yng Ngwynedd i'r dyfodol. Bydd y weledigaeth a'r amcanion yn cael eu mireinio a'u cadarnhau dros y misoedd nesaf ac yn gosod cyfeiriad ac uchelgais i'r dyfodol. Mae'r Cyngor wedi sicrhau cyllid gan Lywodraeth Cymru i gefnogi ymchwil i gyfraniad diwylliant i economi a llesiant cymunedau Gwynedd fydd yn cyfrannu at gynllun gweithredu diwylliant.
- 3.8 Rwy'n hynod falch o weld cynnydd yn ein prosiect Llewyrch o'r Llechi a gyllidir trwy Lywodraeth y DU, Cronfa Dreftadaeth y Loteri, Llywodraeth Cymru a chronfeydd eraill ar draws y cymunedau llechi. Mae gweithgareddau'r prosiect bellach wedi denu dros £35m o fuddsoddiad i Wynedd. Cynhaliwyd Dathliad Blynnyddol Llechi Cymru ar 23 Hydref yn Neuadd Ogwen, Bethesda lle cafwyd y cyfle i glywed am y gwaith rhagorol sydd ar waith gan y Cyngor a'n partneriaid. Agorwyd adeilad Yr Aelwyd ym Mlaenau Ffestiniog yn yr wythnosau diwethaf, dad-orchuddiwyd celf cyhoeddus yn ein trefi a'n pentrefi llechi, cwblhawyd gwelliannau stryd ac arwyddo ac mae gwaith adeiladu ar ganolfan ymwelwyr newydd Parc Padarn wedi ei gwblhau. Yn ogystal a'r gwaith cyfalaf, mae gweithgareddau pwysig o fewn ein cymunedau a'n hysgolion wedi eu cynnal i godi ymwybyddiaeth o'n treftadaeth ac i ysgogi balchder a hyder ein cymunedau.

Prosiect Blaenoriaeth: Adfywio Cymunedau a Chanol Trefi

- 3.9 Mae'r prosiect wedi cyflawni holl gerrig milltir a gytunwyd ar gyfer y chwarter diwethaf, ond mae cryn ymdrech gan y gwasanaethau ar hyn o bryd er mwyn

cwblhau gwariant ar wahanol grantiau a chefnogi partneriaid i oresgyn rhwystrau er mwyn cyflawni deilliannau a chyflwyno hawliadau llawn.

- 3.10 Dros y misoedd diwethaf mae'r Gwasanaeth Cefnogi Cymunedau wedi parhau gyda'r gwaith o adolygu a diweddaru'r Cynlluniau Adfywio Lleol ar gyfer pob un o'r 13 ardal adfywio. Mae pob ardal y wahanol, a'r trefniadau lleol wedi eu teilwrio ar gyfer ardaloedd unigol, a'r Gwasanaeth yn cynnig cefnogaeth pellach o fewn ardaloedd lle nad oes strwythurau lleol wedi sefydlu.
- 3.11 Yn gynharach eleni, llwyddwyd i sicrhau £800k o Gronfa Ffyniant Cyffredin ar gyfer Cronfa Allweddol yn ystod cyfnod 2025/6. Yn dilyn proses ymgeisio, mae 33 o brosiectau lleol wedi eu cefnogi drwy'r Gronfa Allweddol (ac wedi eu nodi yn adroddiad perfformiad Gwasanaeth Cefnogi Cymunedau). Yn ystod y chwarter diwethaf, mae cryn ymdrech wedi bod i gefnogi'r grwpiau / sefydliadau lleol i gwblhau prosiectau o fewn yr amserlen.
- 3.12 Yn yr un modd mae'r Gwasanaeth Rhaglenni Adfywio wedi denu cyfanswm buddsoddiad cronus o £8.9m ar gyfer prosiectau sy'n cyfrannu at hybu ac adfywio canol trefi. Ar hyn y bryd, mae ymdrechion yn canolbwyntio ar weithredu'r prosiectau er mwyn hawlio'r arian grant yn ystod Ch4.
- 3.13 Eleni, fel rhan o Cynllun Adfywio Gwynedd Ni, sefydlwyd Cronfa Cynghorau Tref a Chymuned fel cynllun peilot a gwahoddwyd cynigion am gyfraniad gan pob un o'r Cynghorau hyn. Gyda chyllideb o £370k, mae grantiau wedi eu cynnig i 55 Cyngor Tref / Cymuned Gwynedd. Mae natur y prosiectau yn amrywio ac yn cynnwys cyfres o furluniau o amgylch terfi/ pentrefi, offer chwarae newydd mewn parciau sydd o dan rheolaeth Cynghorau lleol, dodrefn stryd yn cynnwys, raciau cadw beics, meinciau, paneli gwybodaeth, gwelliannau i ganolfannau cymunedol a chynlluniau tirwedd.
- 3.14 Bydd cyfle i'r Pwyllgor graffu ymhellach ar weithgaredd yr Adran wrth gefnogi adfywio canol trefi gan fod bwriad cyflwyno adroddiad penodol yn y flwyddyn newydd.

Prosiect Blaenoriaeth: Creu'r amgylchiadau gorau posib yng Ngwynedd i fusnesau a mentrau cymunedol ffynnu, a chefnogi pobl Gwynedd mewn i waith

- 3.15 Yn y misoedd diwethaf mae ymdrech sylweddol gan yr Adran i gyflawni amcanion cynlluniau blwyddyn ychwanegol ARFOR Llywodraeth Cymru a'r Rhaglen Ffyniant Cyffredin (Shared Prosperity Fund - SPF) Llywodraeth Prydain. Mae'r ddwy raglen ariannol yma, sydd yn dod i ben diwedd Mawrth 2026, wedi bod yn allweddol i gefnogi gweithgareddau'r prosiect blaenoriaeth.
- 3.16 Mae pecyn i ddosbarthu dros £900,000 o gymorth ariannol i fusnesau a mentrau cymdeithasol y sir ar waith. Mae dau gylch ymgeisio wedi eu cynnal, ac mae canlyniadau'r ail gylch ar fin cael ei ryddhau. Mae ymdrech fwriadol wedi bod gan yr Adran i annog ymgeiswyr newydd o bob rhan o Wynedd ar gyfer yr arian; cynhaliwyd 14 o sesiynau cymorth i fusnesau, gyda 181 o fentrau yn mynychu.
- 3.17 Mae hefyd cynllun cymorth ar waith i helpu bobl Gwynedd sydd eisoes yn gweithio ennill mwy o gyflog drwy wella eu sgiliau i gael swydd well neu datrys broblem sy'n atal nhw rhag gweithio mwy o oriau. Ers yr haf mae 48 o bobl eisoes wedi elwa o'r cynllun.

- 3.18 Mae'r Adran wedi sicrhau bron i £600,000 gan yr Awdurdod Dadgomisiynu Niwclear i gefnogi ein gwaith i ddatblygu'r economi dros y 3 blynedd nesaf ac i ddatblygu cynllun amgen ar gyfer safle Trawsfynydd. Dwi'n falch o adrodd fod cynnydd da ar ddatblygu achos busnes ar gyfer datblygu Parc Gwyddoniaeth Trawsfynydd, i warchod, cynnal a chreu swyddi newydd sy'n talu'n dda yng Ngwynedd.
- 3.19 Mae'r gwaith o lunio strategaeth newydd ar gyfer y degawd nesaf i economi Gwynedd hefyd yn mynd rhagddo a dwi'n ddiolchgar am y mewnbwn dderbyniwyd gan y Pwyllgor Craffu a rhanddeiliaid. Mae cael strategaeth yn arbennig o bwysig yng ngoleuni cyhoeddiadau diweddar gan Llywodraeth Prydain a Llywodraeth Cymru am ddyfodol arian i ddatblygu'r economi lleol a sefydlu'r [Gronfa Twf Lleol](#); gyda llai o arian ar gyfer detholiad mwy cyfyng o weithgareddau, bydd gallu adnabod ein blaenoriaethau yn allweddol.
- 3.20 Yn olaf, dwi'n falch o gadarnhau fod gwaith adeiladu wedi cychwyn i godi 10 uned gwaith newydd yn Minffordd. Rhagwelir bydd yr unedau yn barod yn hydref 2026.

Prosiect Blaenoriaeth: Cefnogi trigolion Gwynedd i fyw bywydau llawn a diogel yn ein cymunedau

- 3.21 Er bod prif gerrig milltir y prosiect hwn wedi eu cyflawni, rwyf yn awyddus i adolygu ein trefniadau i gefnogi'r hybiau er mwyn creu model fyddai yn fwy cynaliadwy i'r dyfodol. Byddwn yn trafod cyfleoedd gyda partneriaid dros y flwyddyn nesaf.
- 3.22 Dros y misoedd diwethaf, llwyddodd y Gwasanaeth Cefnogi Cymunedau i sicrhau arian grant o'r Gronfa Ffyniant Cyffredin ar gyfer cyd-lynu a gweithredu prosiect Gwydnwch Cymunedol gyda darparwyr a phartneriaid yn y 3ydd sector. Dros y misoedd diwethaf mae gryn ymdrech wedi bod mewn sefydlu trefniadau gydweithio a bwrw ymlaen gyda'r rhaglen waith. Mae gwaith adolygu y rhwydwaith o bartneriaid hybiau cymunedol yn mynd rhagddo gan adnabod lle a sut gellir dod a Llyfrgelloedd yn rhan o'r model.

4. Gwaith dydd i ddydd yr Adran

- 4.1 Mae Dashfwrdd Perfformiad yr Adran yn Atodiad 2 ac yn cael ei graffu yn rheolaidd. Hoffwn dynnu sylw Aelodau'r Cabinet i'r materion canlynol:

Gwasanaeth Adnoddau Hamdden – Byw'n Iach, Parciau Gwledig Padarn a Glynllifon

- 4.2 Mae'r gwaith buddsoddi grant ym Mharc Padarn a Glynllifon yn parhau. Ym Mharc Padarn mae gwelliannau i'r Incleini, Bloc Croeso newydd a gwelliannau i'r maes parcio bellach wedi eu cwblhau; ynghyd â gwelliannau i rwydwaith llwybrau ym Marc Glynllifon. Mae cyfartaledd boddhad cwsmer y Parciau Gwledig yn 88%, ond mae hefyd werth nodi fod gwaith ehangach yn digwydd ym Mharc Padarn ar hyn o bryd, gan gynnwys buddsoddiad Amgueddfa Lechi Cymru sydd ar gau ar hyn o bryd.
- 4.3 Gwelir fod nifer ymweliadau cronus canolfannau hamdden Byw'n Iach hyd at ddiwedd Medi oddeutu 420,984 – sydd tua 40,779 yn is na'r un cyfnod yn 2024/5. Ystyrir fod sefyllfa'r economi a'r cynnydd sylweddol mewn costau byw wedi rhoi

pwysau ychwanegol ar incwm y sector hamdden. Mae nifer o aelwydydd wedi wynebu blaenoriaethu gwariant hanfodol dros wariant ar weithgareddau hamdden.

- 4.4 Mae ffigurau 2025/6 (hyd yma) yn dangos fod cyfartaledd boddhad cwsmer Byw'n lach wedi cynyddu 1% i 84.51% ers llynedd. Serch hynny, mae adborth ynghylch safon cyfleusterau yn sgorio isaf, ac yn ffactor sydd yn effeithio ar brofiad cwsmeriaid ac mae ymdrechion yn parhau i geisio adnabod cyfleoedd i'w gwella.
- 4.5 Dros y misoedd diwethaf llwyddwyd i ddenu grantiau er mwyn gwneud gwelliannau i ystafell ffitrwydd Canolfan Hamdden Dwyfor, gwelliannau i Ganolfan Tennis Arfon, adnewyddi cae 3G Tywyn, a gwelliannau wedi eu cwblhau ar gyfer caeau 3G yn Nolgellau a Porthmadog; ynghyd a gwelliannau trin dwr yn Nghanolfannau Bala ac Arfon.
- 4.6 Fel adroddwyd yn gynharach eleni, rwy'n parhau i fod yn bryderus fod nifer disgyblion Gwynedd sydd yn cael gwersi nofio yn ein canolfannau yn parhau i ostwng. Yn Dilyn trafodaethau gyda Byw'n lach a'r Adran Addysg, llythyrwyd gyda chyrff Llywodraethol ysgolion Gwynedd gan ofyn iddynt roi ystyriaeth bellach i'r risgiau a'r anghyfartaledd ar draws y sir. Mae Byw'n lach hefyd yn ystyried datblygu pecynnau penodol ar gyfer ysgolion fyddai o bosib yn gwneud ymweliadau i'r canolfannau hamdden yn fwy atyniadol a chynnig gwerth am arian pellach.

Gwasanaethau Morwrol, Hafan Pwllheli a Doc Fictoria, Caernarfon.

- 4.7 Fe nodwch o'r Atodiad fod 68% o ymatebwyr arolwg boddhad cwsmer traethau o'r farn fod eu profiad yn 'dda iawn' neu 'dda'. Mae'r adborth dderbynnir o'r arolygon yma yn ddefnyddiol iawn i alluogi'r gwasanaeth ymateb gyda Adrannau eraill o'r Cyngor.
- 4.8 Cynyddodd nifer cwsmeriaid gyda chytundeb angori 9% yn ein harbyrau yn 2025/26 o'i gymharu a llynedd, sef cynnydd o 250 i 273 (dim yn cynnwys Hafan Pwllheli a Doc Caernarfon). Fe nodwch hefyd fod angorfeydd Hafan Pwllheli wedi bod 97% yn llawn yn 2025/26, gyda 86% o'r angorfeydd yn yr harbwr allanol yn llawn dros yr un cyfnod.
- 4.9 Mae pryderon yn parhau ynghylch lefelau siltio yn harbwr Pwllheli. Dros y misoedd diwethaf mae'r Gwasanaeth (gyda chefnogaeth technegol YGC) wedi symud ymlaen gyda gwaith rhagbaratoi a thechnegol pellach wedi ei wneud fel rhan o strategaeth garthu. Yn gymharol ddiweddar, gwelwyd gwyntoedd cryfion (storm Amy) yn creu difrod yn ein harbyrau, ac rwyf yn ddiolchgar iawn i'r staff am eu gwaith arbennig yn delio gyda'r sefyllfa.

Gwasanaethau Archifau, Amgueddfeydd, Celfyddydau a Llyfrgelloedd

- 4.10 Fe nodwch fod 93% o ddefnyddwyr Gwasanaeth Archifau yn 'fodlon iawn' gyda'r gwasanaeth (cynnydd o 2%), 5% yn fodlon, 2% yn anfodlon. Roedd y mwyafrif o sylwadau a dderbyniwyd yn gadarnhaol iawn, ond o'r rheiny nad oedd yn fodlon

derbyniwyd sylwadau am yr oriau agor. Cwtogwyd yr oriau agor i'r isafswm a ganiateir gan yr Archifdy Gwladol yn sgil toriadau nôl yn 2016. Sicrhaodd y Gwasanaeth grant £141,000 gan Lywodraeth Cymru i fuddsoddi yn Archifdy Caernarfon ac Archifdy Dolgellau. Bydd y gwaith wedi ei gwblhau erbyn Ebrill 2026 a bydd yn gwella cadwraeth ynni'r adeiladau a'r profiad a'r awyrgylch i ddefnyddwyr yn yr ystafelloedd ymchwil.

- 4.11 Mae'r Gwasanaeth Celfyddydau Cymunedol wedi parhau i gefnogi gweithgareddau celfyddydau a llesiant ar draws Gwynedd gyda 99% o fynychwyr y sesiynau yn credu eu bod wedi cael budd o'r weithgaredd. Mae 'Stiwdio Lles', sef prosiect gan Fran Wen gyda Phrifysgol Bangor yn cynnig sesiynau celf ar brescripsiwn i bobl ifanc. Nododd un mynychwr *"Rhaid iddo gario mlaen, mae'r celfyddydau yn gwneud gymaint o wahaniaeth i iechyd a lles bobl."*
- 4.12 Trwy arian SPF mae gweithgareddau ymgysylltu a digwyddiadau Storiol wedi parhau i fod yn boblogaidd. Penodwyd cwmni i redeg caffi Storiol a gobeithio y bydd yn agor ar ei newydd wedd yn y flwyddyn newydd. Cynhaliwyd sesiwn gyhoeddus i ymgynghori ar ofodau allanol Storiol a'r cyswllt gyda Pontio. Sicrhawyd cyllid i Amgueddfa Lloyd George a Storiol i lunio Cynlluniau Datblygu Cynulleidfa er mwyn cynyddu niferoedd yr ymwelwyr i'r ddau leoliad.

Gwasanaethau Rhaglenni Adfywio a Chefnogi Cymunedau

- 4.13 Mae'r gwasanaethau Datblygu'r Economi, Twristiaeth, Adfywio a Chefnogi Cymunedau wedi canolbwyntio eu hymdrechion dros y flwyddyn diwethaf ar weithredu'r prosiectau blaenoriaeth sydd wedi cael eu hamlinellu yn Atodiad 1. Mae perfformiad y gwasanaethau hyn yn ddibynnol ar arian grant ac mae pob pecyn cymorth ddarperir i bartneriaid, cymunedau a mentrau yn cael eu monitro a gwerthuso yn unol â thelerau'r arianwyr.

5. Adroddiadau Archwilwyr Allanol (os yn berthnasol)

- 5.1 Derbyniwyd Adroddiad Asesu Blynyddol 2024-25 ar gyfer Gwasanaeth Llyfrgelloedd Gwynedd gan Is-Adran Diwylliant Llywodraeth Cymru. Rwy'n falch o nodi bod y Gwasanaeth yn bodloni pob un o'r 13 Hawl Graidd. Nodir: *'Bod cwsmeriaid yn gwerthfawrogi Llyfrgelloedd Gwynedd, ac mae ganddynt feddwl mawr ohonynt. Mae'r gwasanaeth yn parhau i berfformio'n dda mewn nifer o feysydd gan gynnwys e-fenthyciadau ac ymweliadau rhithwir. At hynny, mae Gwynedd yn arwain ar weithredu prosiect LMS Cymru. (...)*
- 5.2 Yr agwedd ar yr adroddiad eleni sy'n peri'r pryder mwyaf yw'r gostyngiad yng nghyfanswm y staff a chyfanswm y staff cymwysiedig fel ei gilydd. Er ei bod yn gadarnhaol bod aelodau staff yn cael eu cefnogi drwy Siarteriaeth CILIP, a fydd yn effeithio, gobeithio, ar niferoedd y staff cymwysedig yn y dyfodol, mae'r gostyngiad parhaus yn y niferoedd staffio yn debygol o gael effaith ar allu'r gwasanaeth i barhau i fodloni anghenion cwsmeriaid l'r un lefel uchel a ddarparwyd ganddo yn y gorffennol".

- 5.3 Mae'r Gwasanaeth wedi wynebu newidiadau i'r strwythur staffio – yn benodol oherwydd yr angen i wneud arbedion a thoriadau yn sgil yr hinsawdd ariannol sydd ohoni, ond trwy gefnogi hyfforddiant, rydym yn ceisio rheoli'r feirniadaeth yma. Hoffwn gyfleu fy niolchiadau i staff y Gwasanaeth Llyfrgelloedd am eu gwaith a'u llongyfarch ar ganlyniadau'r adroddiad asesu.

6. Ymgynghori

- 6.1 Mae'r adroddiad wedi ei greu yn seiliedig ar wybodaeth a chynnwys cyfarfod diweddaraf i herio a chefnogi perfformiad yr Adran 10 Tachwedd 2025, gyda'r Prif Weithredwr, y Pennaeth Adran, Rheolwyr Gwasanaeth a finnau yn bresennol yn y cyfarfod hwn.

Atodiadau

Atodiad 1: Adroddiadau cynnydd cerrig milltir prosiectau Cynllun y Cyngor

Atodiad 2: Mesuryddion Perfformiad yr Adran